

CARTA JEE CUAHAN NUU ÑAYUU HEBREO

Jeē ní tají Yaā Dios Séhe ya ni nacani ya jnūhun

¹ Tijni jínu te tijni modo ni cahān Yaā Dios jíin táca jíi yō nde jenahán, chi ni tají yá tēe ni canacani jnūhun ya. ² Te vijna te tiempo cuándihí yāha ní tají yá maá Séhe ya ni nacani ya jnūhun nuū yō. Te jíin Séhe ya ni sáha ya ñayīvi jíin táca gá, te ndivii jeē iyó ní chihi ya ndaha Séhe ya. ³ Te Séhe ya yōhyo luu cújéhnú ya, nájnūhun luu cújéhnú máá yá. Te ndihí ndese cúu máá yá, suni súcuan cúu Séhe ya. Te jíin poder jnūhun ni cahān Séhe ya te iyó cutú ndihí-ni. Te ni sándoo ya yohó táca cuéchi yó, te sáa te ni cucōo ya lado váha mesa maá Yaā cújéhnú nde andiví.

Jeē cújéhnú ga Séhe Yaā Dios vēsú tācá ndajéhé yā

⁴ Te ni ndujéhnú ndasí gá Séhe ya vēsú tācá ndajéhé andiví, chi ni nihīn yā tahū jeē ndiso ya jniñu jéhnú ndasí gá vēsú jniñu cándiso ndajéhé.

⁵ Chi súcuan ni cahān Yaā Dios jíin Séhe ya, te nasūu jíin ndajéhé yā:

Máá ró cúu Séhe ri,

te vijna te ni sajeéhnú ri rohó jéē cúu ri Tatá rō.

Te suni ni cahān yā jnūhun Séhe ya, te nasūu jnūhun ndajéhé yā:

Máá rí cúu Tátá nuū Séhe ri,

te máá i cúu Séhe nuū rī.

⁶ Te suni ná ni tají yá Séhe ya cújéhnú, ni quiiji ini ñayīvi yáha, te ni cahān yā:

Ndihí ndajéhé rī na chíñúhún i Sēhe ri.

⁷Te ni cahān tucu ya jnūhun ndajéhé yā:

Nájnūhun quée tachī, súcuan cájica ndajéhé rī sáha ri,

te tācá un jéē cájejniñu nuū rī, nájnūhun yáñuhūn cácuu.

⁸Te jnūhun Sēhe ya chi sa suhva cáhán yā:

Máá ró cúu Yaā Dios, te ndacu ró jniñu ní cáni,

te jniñu ndácu ró, máni jniñu ndaā cúu.

⁹Cúsī ni rō jín jniñu váha, te jíto uhū rō jniñu néé.

Jeē yúcuan ruhū, Yaā Dios maá ró, ni sáha ri

jeē yóhoyo ga cúsi ni rō vésú tāca gá jeē iyó andiví.

¹⁰Te suni cáhán yā:

Máá ró cúu Jitoho, te nde xīhna ñúhún ni sáha ró jéē ni jécōo ñayiví.

Te andiví chi suni jeē ni sáha ró cúu.

¹¹Te tācá un chi naa, te máá ró chi ní cáni iyó ró.

Te tācá un chi cutúhú nájnūhun cutúhú ñin sahma,

¹²te nacaquin jnahnū rō te nasama ró jínáhan.

Te máá ró chi ma sáma cuiti rō,

te quiví cótecu rō ma ndíhi cuiti.

¹³Te súcuan ni cahān tucu yā jín Séhe ya, te nasūu jín ndajéhé yā:

Cucōo ró lado váha ri nuū cujéhnú ró,

te na sáha ri jeē quende rō poder tāca jéē cájito uhū rohó.

Achí yá. ¹⁴Te tācá ndajéhé yā chi mozo-ni cácuu, te tájí yá cuangoo jeē chindéé ñáhán ñáyuu jeē nihín tahū jeē jnama ya.

Jeē ma cúhuun ni yō jín jnúhun jnáma ya yohó

2

¹ Núu súcuan te cánuú jéē váha ga chuhun ni yō tāca jnúhun ya jeē ní cajini yó, chi núu tuú te sanaa te scuíta yó. ² Chi nde jenahán ní jejniñu ya ndajéhé yā ni cacastūhun jnúhun ya, te ni cajini ñayuu jeē iyó ndāā. Te ñayuu nīhni ni jíin ñáyuu tu ní cájendetū jnūhun ún, vetū-ni ni canihīn i castigo. ³ Te núu súcuan ni cuu, te yóhó, ¿ndese cācu yó núu ma chúhun ni yō jnūhun cánuú gá jeē jnáma ya yohó? Chi xīhna gā maá Jítóho yō ni nacani ya jnūhun yáha, te sáá te tēe jeē ní cajini nahín ni canacani ndāā tucu máá de nuū yō. ⁴ Te Yaā Dios suni ni chindéé ñáhán yá de jeē ní canacani de jnūhun ya. Chi ni sáha ya jíin de jeē ní casáha de sīn sīn jniñu jéhnu jeē nahán náā ni yō jíto yó poder yā. Te suni ni jēhe ya Espíritu Santo yā nuū ĩn ĩn yó, ndese ni nujnahan ni maá yá sáha yó.

Jeē ní nduu Jesús jnáhan ñayuu

⁵ Te Yaā Dios nasūu núu ndajéhé yā ni jēhe ya jnūhun jeē condiso jniñu siquī ñayīví jéē quíji, chi sa suhva nuū Séhe ya Cristo ni jēhe ya. Te siquī ñayīví un cúu jeē cahán rī yāhá. ⁶ Chi suhva yósó núu tútu jeē ni cáhān David jíin yá:

¿Na vé cúu ñayuu jeē ñúhun ni ní i?

Te ndíhví ni ni síquī i, te máá ñáyuu cúu i.

⁷ Chi jecu-ni tiempo ni sáha ní jeē núu i nuū tācá ndajéhé ni.

Yūcuán na te sajéhnu ní i te squéndōo yíñúhún ní i, te cani ní i jeē ndacu i jniñu nuū tāca jéē ni sáha ní.

⁸ Te ndíhi jeē iyó chi sáha ní jéē cujéhnu i siquī.

Achí tutu. Te jeē ni sáha Yaā Dios jeē cujéhnu i siquī ndíhi, núu súcuan te ma quéndōo ni ĩn jeē ma

cújéhnū i siquī. Te vēsú súcuan te vijna te ná tu coto yó jéē cújéhnū i siquī ndihī jeē iyó. ⁹ Te jeē jiní yō vijna cúu Jesús, Yaā jeē ní nduu núu jecu-ni tiempo nuū tācá ndajéhé yā. Chi ni ndoho ya jeē ni jīhī yā jehē yō, te jeē yúcuan ní ndujéhnū luu tucu ya, te ndihī cáhīyo yíñúhún núu yā. Chi jeē váha ni Yaā Dios jín yó, jeē yúcuan ní jīhī Jesús jehē yō.

¹⁰ Te ndihī jeē iyó chi cuenta Yaā Dios cúu, chi máá yá ni sáha. Te suni ndéca ya cuehē ndasí séhe ya jeē quihín i andiví núu luu cújéhnū i jín yá. Te vāha níhín jñíñu jeē ni jéhe ya jñúndóho nuū Jesús, chi jeē ní ndoho ya súcuan te cuu condeca vāha ya ñayuu ní jnama ya. ¹¹ Chi Jesús jeē ni sándoo ya i te máá i jeē ní candundoo i, chi ñn-ni Tátá i jín yá. Te jeē yúcuan tu cúcanu Jesús jeē cahán yā hermano yā jín i, vēsú ndasí núu i. ¹² Chi yósó núu tútu jeē ni cáhān yā jín Tátá yā:

Cachi na jnúhun ní núu tācá hermano na,
te mēhñu núu cándutútú i cata ná ndese cújéhnū ní.

¹³ Te suni cáhān yā nájñūhun cácahān hermano yā:
Ruhū chi cándíje ri yā.

Te cáhān tucu yā:

Yāha íne ri jín táca gá sēhe Yaā Dios jeē ni jéhe ya
nuū rī.

Achí Jesús.

¹⁴ Te nájñūhun cácacu ñayuu jeē cúu i yiqui cúñu, suni súcuan ni cacu Jesús, návāha cuu yā jehē yō. Te súcuan ni snāā yā poder jexeén jeē squívi ñayuu nuū cuéchi te jíhí i. ¹⁵ Te ni cacu ya súcuan návāha cuu quenehen ya tāca ñáyuu chíji jñūhun jeē yuhú i cuu i. Chi ní vida i ndóho i sáha ún. ¹⁶ Te jendaá tu ní quíji ya jeē chindéé ñáhán yá tācá ndajéhé yā, chi sa suhva jeē chindéé ñáhán yá ñayuu cácaandíje

jeē ní nduu yucūn Abraham. ¹⁷ Jeē yúcuan ní jini ñúhún nduu inuú yá jíin táca hermano yā, návāha cuu ya sutū cujéhnū jeē squícu vāha ya tācá jniñu jehē i nuū Yaā Dios. Chi ni cundáhú ni yā i, te ni ndahva yā cuēchi i jeē ni sócō yā maá yá jehē i. ¹⁸ Chi suni máá yá ni ndoho ya jeē ní jito ndee jnūndóho ya, te jeē yúcuan cuu chindéé ñáhán yá ñayuu jeē jíto ndee jnūndóho i.

Cújéhnū ga Jesús vēsú Moisés

3

¹ Hermano, ni cana Yaā Dios rohó, te cácuu ró ñáyuu ndoo máá yá. Núu súcuan te na nácani vāha ni rō síquī Cristo Jesús, Yaā cúu apóstol jeē ní tejniñu Yaā Dios, te suni cúu ya sutū cujéhnū síquī jnūhun cácandíje yó. ² Chi ni squícu vāha ya nuū Yaā Dios, Yaā ní tee jniñu un síquī yā, nájñūhun ni squícu vāha Moisés nuū ñáyuu jeē ní cáhān Yaā Dios jeē cácuu i ñayuu vehe ya. ³ Chi cújéhnū ndasí gá Jesús vēsú Moisés, nájñūhun cújéhnū ndasí gá tēe sáha vehe nasūu máá vehe. ⁴ Chi tācá vehe íyó tēe ni sáha. Te máá Yaā Dios cúu jeē ni sáha tāca jēē iyó. ⁵ Te Moisés ni squícu vāha de jíin jniñu jeē ní cuu de mozo ni condito de ñayuu vehe Yaā Dios. Te ni castūhún de síquī tāca jnūhun jeē steén yā tiempo quiiji. ⁶ Te Cristo chi sa cúu ya maá Séhe jeē ndácu jniñu nuū ñáyuu vehe Tátá yā, te vāha squícu ya jeē ni jéjnūhun ya nuū i. Te suni máá yó cácuu ñayuu vehe ya, te núu na cuíñi nīhin yó jíin jnūhun cándíje yó ndé quiivī sándihí, te núu cúsñi ni yō jeē ñūhun ni yō tāca jēē váha jeē coo.

Jñūhun jeē ndetātu ñáyuu Yaā Dios

⁷ Núu súcuan te na chùhun ni yō jeē cahán Espiritu Santo nuū tútu iī:

Vijna te núu cuni sōho ró jēē cahán Yaā Dios,

⁸ te ma cúnīhni ni rō nájnūhun ni cacunīhni ni ñayuu jenahán.

Chi tu ní cájendetū i nuū yā ná ni cajica i nuū ñúhun téhé.

⁹ Chi yūcuan ní casáha jíí rō jniñu jeē ni quítī ni rī, achí yá,

vēsú ni cajito i tācá jniñu ni sáha ri uū xico cuiyā.

¹⁰ Jeē yúcuan ní quítī ni rī jíín ñáyuu tiempo un.

Te ni cahán rī jeē máni jeē castóo i ichi ndaā, chi tu cácuni i condiquīn i jnūhun ri.

¹¹ Te jeē yúcuan ní quítī ni rī, te ni cahán teyí rí jeē ma quívicoo cuiítī i nuū ndetātú i sáha ri.

Achí yá.

¹² Núu súcuan hermano, coto má conéé ánuá ni ñn ró jēē cáca yátá ró jeē tuá candíje ró Yaā Dios, Yaā técu. ¹³ Chi sa suhva tāca quívī na stíhvī jnáhan ni rō, ní ní gá iyó tiempo, návāha ma cúnīhni ni ni ñn ró te stáhú róhó sáha ró cuéchi. ¹⁴ Te núu na cuiñī nīhin yó ndé quívī sándīhi jíín jnūhun jeē ní quejéé yó jíín, yūcuán na te cuu yó jnáhan Cristo.

¹⁵ Chí cáhán tutu:

Vijna te núu cuni sōhó ró jēē cahán Yaā Dios,

te ma cúnīhni ni rō nájnūhun ni cunīhni ni ñayuu jenahán.

Achí. ¹⁶ ¿Te ndé-ni cúu ñayuu jeē ní jini jnūhun ya te ni cunīhni ni? Suu ndihī ñayuu jeē ni scácu Moisés jeē ní quendacoo Egipto. ¹⁷ ¿Te ndé-ni cúu ñayuu jeē ní quítī ni yā nuū uū xico cuiyā? Suu ñayuu jeē ní casáha cuéchi, te ni cajihī i nuū ñúhun téhé. ¹⁸ ¿Te ndé-ni i cúu jeē ni cáhán teyí yá jeē ma quívicoo

cuiti i nuū ndetātú i sáha ya? Suu máá ñáyuu jeē tu ní cájendetū nuū yā. ¹⁹ Núu súcuan te jíní yō jeē tu ní cúu quívicoo i nuū ndetātú i, siquī jeē tu ní cá candíje i ya.

4

¹ Te níní íyó gá jnūhun jeē ni jéjnūhun ya jeē quívicoo ñayuu nuū ndetātú i sáha ya, te na cónso íyo yó jéē ma stívi yó, návāha tú coo jíin sava ró jéē ma nihín rō quívi ró. ² Chi suni máá yó ni cajini sōho yó jnúhun jeē jnáma ya yohó, nájnnūhun ñayuu jenahán un. Te nuū maá i tu ní jéjníñu jnūhun ni cajini i ún, siquī jeē tu ní cá candíje i. ³ Te yóhó jéē cá candíje, máá yó cúu jeē quívicoo yó núu ndetātu yó. Te siquī ñáyuu tu cá candíje ni cahán yā suhva: Jeē yúcuan ní quitī ni rī, te ni cahán teyí rī jeē ma quívicoo cuiti i nuū ndetātú i sáha ri. Te súcuan ni cahán yā vēsú je íyó túhva nuū ndetātú i nde ná ni jecōo ñayívi. ⁴ Chi súcuan yósó jnúhun nuū tútu iī siquī quívi uxá: Ni sínu Yaā Dios tāca jéē ni sáha ya, te ni ndetātu yá quívi uxá.

⁵ Te suni nuū tútu un yósó tucu:

Ma quívicoo cuiti i nuū ndetātú i sáha ri.

Achí yá. ⁶ Núu súcuan te sava ñayuu chi quívicoo nahín i nuū ndetātú i. Te ñayuu jenahán jéē ní cajini jnūhun jeē jnáma ya i, tu ní quívicoo i siquī jeē tu ní cájendetū i nuū yā. ⁷ Jeē yúcuan ní jeni tucu ya inga quívi jeē quívicoo ñayuu, te quívi un cúu vijna. Chi ná ni yāha cuehē tiempo jeē ni cáhán yā jíin ñáyuu jenahán, te yósó núu tútu jeē ni sáha ya jeē suni ni cahán David suhva:

Vijna te núu cuni sōho ró jéē cahán yā,

te ma cúnihni ni rō núu súcuan. Achí tutu. ⁸ Te nde jenahán ní squívi Josué ñayuu Israel un ñuu nuū ndetātú i. Te tu ní cúu squívi de i nuū ndetātu ánuá i sáha ya. Chi núu súcuan te ma cahán gā Yaā Dios jíin táca ñáyuu jeē vijna cúu quívi jeē quívicoo i nuū ndetātú i. ⁹ Núu súcuan te íyó túhva nahín ñn nuū ndetātu ñáyuu Yaā Dios, nájnūhun ni ndetātu máá yá. ¹⁰ Chi ñayuu jeē quívicoo nuū ndetātú i jíin yá, chi ndetātú i jeē ní casájniñu i, nájnūhun ni ndetātú Yaā Dios nuū jníñu ni sáha máá yá. ¹¹ Núu súcuan te na ndúcú ndéyí yó quívi yó núu ndetātu yó un, te ma sáha ni ñn yó cuéchi jeē ma cándíje yó, nájnūhun ni casáha i nde saá.

¹² Chi jnūhun Yaā Dios ndíto técu te íyó poder. Chi cúu nájnūhun ñn espada jeē xeén ndindúú lado, chi nástúu cájí ndese íyó jéē níjnūní yō jíin ánuá yō, nájnūhun sáha espada jeē jéhnde te nástúu nuū ñujnáhan yíqui jíin meque. Te jnūhun ya nástúu ndíhi ndese jéni ni yō jíin ndese cúní yō sáha yó. ¹³ Te tu íyó ni ñn jeē yísahí jeē tu jíiní maá Yaā jeē náquihin cuenta, chi ndíhi-ni jíiní vāha ya, te ndíhi-ni túu ndijin nuū yā.

Jesús cúu sutū cujéhu ga

¹⁴ Te cánevāha yó ñn sutū cujéhu ga, te je ni ndaa ya ni ndívi ya nuū íyó Yaā Dios. Te Jesús Sēhe Yaā Dios cúu ya. Jeē yúcuan na cuíñi níhin yó jíin jnúhun jeē ní candíje yó. ¹⁵ Chi névāha yó ñn sutū cujéhu jeē jíto ndáhú yóhó jeē tu fuerza yō squícu vāha yó. Chi nájnūhun ndóho yó jéē jíto ndee jexeén yohó, suni súcuan ni ndoho ya jeē ní jito ndee un yá, vēsú tú cuíti cuéchi ya. ¹⁶ Núu súcuan te ma yūhu yó, chi

na quívi yó yuhu mesa yā, cúu jeē cacān tahu yō. Chi manī yā jíin yó, te cúndáhú ni yā yohó, te siquī jeē váha ni yā te chindéé ñáhán yá yohó táca jínu jeē jíni ñúhún yó.

5

¹ Chi tāca sūtū jeē ní cujéhnū jenahán, ni nacāji Yaā Dios de mēhñu ñáyuu, te ni jeni ya de jeē cuíñi de nuū yā jehē ñayuu, te socō de ndajníñu jíin quiti nuū yā jeē siquí cuēchi i. ² Te cuu cahān vítá de jíin ñáyuu tu jécūhun ni jíin ñáyuu castívi, chi máá de suni tú na fuerza ini de squícu vāha de. ³ Jeē yúcuan cúu jeē suni cánuú sócō de quiti nuū yā jeē siquí cuēchi máá de, nasūu máá-ni jeē siquí cuēchi ñayuu.

⁴ Te ni ñn tēe tu cúu sájéhnū de máá de jeē cuu de sutū cujéhnū, chi sa máá Yaā Dios cúu jeē nácāji ya de, nájñūhun ni nacāji ya Aarón nde jenahán.

⁵ Te suni súcuan Cristo, tu ní sájéhnū ya maá yá jeē cuu ya sutū cujéhnū, chi sa Yaā Dios ni sáha, chi ni cahān yā jñūhun yáha:

Máá ró cúu Sēhe ri,

te vijna te ni sajéhnū ri rohó jéē cúu ri Tatá rō.

⁶ Te suni cáhán tucu ya nuū tútu i:

Ní cáni cúu ró sūtū,

nájñūhun sutū Melquisedec jenahán.

⁷ Te Cristo, ná ni condee ya ñayívi, te ni jicān tahu yā, te nde ni ndahyū yā te ni ndahyū cohó yá. Te ni cahān ndahú yá jíin Yaā Dios, Yaā jeē cúu jnama ya jeē ma cúu yā nuú. Te siquī jeē yíñúhún ní chíñúhún yá Yaā Dios, te ni chindéé ñájñáhan Yaā Dios jíin yá nuū jñúndóho ún. ⁸ Chi vēsú Sēhe Yaā Dios cúu ya, te ni jendetū yā ni ndoho ya ini ñayívi, te súcuan ni jini yā ndese cúu jñūhun jendetū. ⁹ Te

ná ni cuu ni squícu ndihí ya jeē ní jendetū yā, te ni cucutú jnúhun jeē jnáma ya tāca ñáyuu jéndetū nuū yā, te cotecu i níí cáni. ¹⁰ Chi ni jeni Yaā Dios yā jeē cúu ya sutū kujéhnū nájñūhun sutū Melquisedec.

Siquī jeē ma cáca yátá i

¹¹ Te íyó cuéhē jñūhun jeē castūhun rí siquī tāca jēē yáha. Te yíí cúu jeē jécūhun ni rō sáha rí, siquī jeē tu cácu ni rō chuhun ni rō. ¹² Te je ni cunahán cácuandíje ró, te jini ñúhún jéé cúu ró tēe stéén nuū. Te tuú chi sa cájini ñúhún tucu máá ró tēe stéén nuū rō tāca jnúhun Yaā Dios jeē tú yíí cuií. Chi sa ni canduu ró nájñūhun sūchi yíquín jéé jini ñúhún caxin i, chi ná tu ije i caji i jeē ndáva. Súcuan cácuu ró chi ná tu ije ró jíín jnúhun yíí gá. ¹³ Chi núu máni máá nájñūhun sūchi yíquín jéxin cácuu ró, núu súcuan te tu cúu jecūhun vāha ni rō jñūhun ndaā. ¹⁴ Te ñayuu jeē jé ni ije, chi cáyeji i jeē ndáva, cúu jeē ní cutūhva vāha i te je cúu nácāji i jeē váha jíín jéé neé.

6

¹ Núu súcuan te na yáha yó núu tāca jnúhun Cristo jeē tú-ni yíí, te na quíhín yō nuū jnúhun yíí gá, návāha na íje vāha ni yō jíín jnúhun ya. Te ma ndejéé tucu yó jíín jnúhun jeē ni scuáha yó xíhna gā, suu jñūhun jeē nácani ni yō stóo yo cuéchi yó jéé cúu yō sáha, jíín jéé candíje yó Yaā Dios, ² jíín síquī jeē jéndute, jíín síquī jeē soó ndaha xiní ñáyuu, jíín síquī jeē nátecu ndíyí, jíín síquī jeē jnahnú ndetū ñayuu níí cáni. ³ Núu súcuan te na yáha yó núu tāca jéé yáha te quívi yó núu jnúhun yíí gá, te núu cuāha Yaā Dios jñūhun.

⁴ Chi íyó ñáyuu jeē jé ni jecūhun ni i, te je ni jini i tāca jée jéhe Yaā Dios, te je ni quivī i nuū jnūhun stéén Espíritu Santo, ⁵ te suni je ni jini i jnūhun vāha Yaā Dios jíin ndese coo poder yā tiempo quiji. ⁶ Te ñayuu un núu caca yátá i, te ma cúu ga ndejée jeé i jeē nácani ni i. Chi jeē cáca yátá i cúu nájñūhun jeē nácahni tucu i Sēhe Yaā Dios jicā cruz, te cájēhe i jnūhun canu yā cájito ñayuu. ⁷ Te ñayuu chi cácuu i nájñūhun ñuhun jeē cúun vāha saū nuū te ndóyo vāha. Te núu cánecoo jeē váha caji tēe cásájñiñu, yūcuán na te cúsiñi ni Yaā Dios jíin. ⁸ Te núu máni iñu yóquin jíin yucū sajnéñu cánecoo nuū, núu súcuan te tu jéjñiñu cuiñi, te squéndōo iñi yā, te iñi quivī te cayū. Súcuan jnahnū ndetū ñayuu cájica yátá.

Jeē ñūhun ni yō tāca jée váha jeē coo

⁹ Te máá ró jijnáhan ró hermano, vēsú cácahān rī súcuan jíin ró, te cácuahnu ni rī jeē cácuu ró ñayuu cuiñi ñihin, chi ñayuu ni jnama ya cácuu ró. ¹⁰ Te Yaā ndaā cúu Yaā Dios, te tu náa ni yā jniñu cásáha ró. Chi siquī jeē cáhīyo manī rō jíin yá te ni cacundáhú ni rō hermano rō cácañdije, te ni cachindéé ñáhán ró i, te súcuan cásáha ró ndé vijna. ¹¹ Te cácuu rī jeē niní súcuan sáha ga ná iñi ná iñi ró ndé quivī sándihí, chi jeē sáha ró súcuan te nihīn rō ndihí jeē cáñuhun ni rō. ¹² Te cácuu rī jeē ma cúhuun ni rō, chi sa ndacu ró ñáyuu cácañdije jeē jíin paciencia cándetu i, te jeē yúcuu níhīn tahu i tāca jée ni jéjñūhun ya.

¹³ Chi quivī jeē ni jéjñūhun Yaā Dios nuū Abraham, te ni ndacunehen ya maá yá jeē ni jéjñūhun téyí yá, chi tuá na iñga ndacunehen ya jeē cujéñu ga vēsú maá yá jeē cuu testigo yā. ¹⁴ Te ni cahān

yā: Jendaá ndije jeē vāha ndasí sáha ri jíin ró, te sáha ri jeē nducuehē ndasí yúcūn rō, achí yá jíin Abraham. ¹⁵ Te jíin paciencia ni condetu de, te súcuan te ni nihīn de jeē ní jejnūhun ya. ¹⁶ Te núu cáhán teyí ñáyuu, te ndácunehen i síhví ñn jeē cujéhnū ga vēsú maá i. Te núu íyó ñn jnūhun jeē tu cácandíje jnáhan, te núu ñn tēe cáhán teyí de jíin síhví Yaā Dios, yūcuán na te jécuiñi jeē cátejnhán. ¹⁷ Te suni súcuan Yaā Dios, chi ni jejnūhun téyí yá nuū ñáyuu jeē cuāha ya tahū i. Chi ni cuni yā jeē cucáhnu vāha ni i jeē ma nácani yátá ni yā síquī jeē ni jéjnūhun ya nuū i. ¹⁸ Chi ma nácani yátá cuiti ni yā síquī jnúhun jeē ni cáhān yā uū jínu, ñn jeē ni jéjnūhun ya, te inga jeē ni cáhān teyí tucu ya síquī suni jnūhun ún. Chi tu stáhú cuiti yā. Te jeē yúcuan máá yó jeē ní tūhva yó yá, chi yōhyo íyó ndeyí ni yō, te cáñuhun teyí ni yō jeē squícu ya jeē ni cáhān yā. ¹⁹ Te síquī jeē súcuan ñúhun ni yō, te suu sáha jeē quéndōo nīhin ánuá yō jíin jnúhun ya, te quéndōo ndaā ni yō, nájnūhun quéndōo nīhin barco jeē jñi gancho yuū. Te sáha jeē cúu quívi yó andiví núu íi gā, nájnūhun cuarto íi gā jeē ni íyo ichi yátá sahma ni ndita caa ini vehe íi jenahán. ²⁰ Te ini yūcuán chi xīhna gā Jesús ni quívi, návaha nune ya ichi quívicoo yó. Te jeē yúcuan ní cáni cúu ya sutū cujéhnū nájnūhun sutū Melquisedec.

Jeē cúu Jesús sutū nájnūhun Melquisedec

7

¹ Te máá Melquisedec ni cuu de rey ñuu Salem, te ni cuu de sutū nuū Yaā Dios, Yaā cujéhnū téyí. Te ni jejnahan de Abraham ná ni nandicó Abraham

jeē ní cundeyí de ni cajejnáhan de jíin táca rey. Te ni jicān tahu de jehē Abraham. ² Te tāca úxī ndajníñu jeē ní quende Abraham nuū tāca rey un, ni jēhe de ñn ñn siquī un núū Melquisedec. Te síhví Melquisedec cuní cahān: rey jeē sāha jniñu ndaā. Te suni nání de rey Salem, te jnūhun Salem cuní cahān: jeē iyó ndeyí síñ ni. Te jeē yúcuan suni nání de: rey jeē sāha jeē iyó ndeyí síñ ni ñayuu. ³ Te tu cáhán tutu jnūhun tátá de ni náná de ni tāca jíí de. Ni tu cáhán núu ni cacu de, ni núu ni jihī de. Chi cúu de nájñūhun Jesús, Sēhe Yaā Dios, chí ñí cáni cúu de sutū.

⁴ Te condēhe jíjnáhan ró náa jéhnú ni cuu Melquisedec, chí jíí jéhnú yó Abraham ni jēhe de ñn ñn siquī tāca jéē uxí nuū de siquī tāca jéē ní quende de nuū rey un. ⁵ Te jíí yō jeē tāca úxī ndajníñu ni canihīn ñayuu, ni cajēhe i ñn ñn siquī un ní caquihin tēe cácuu sutū yucūn Leví, nájñūhun cáhán ley Moisés. Te ni caquihin de nuū ñayuu cácuu jnáhan de, chí ñn-ni yucūn Abraham cácuu de jíin i. ⁶ Te Melquisedec nasūu yúcūn Leví cúu de, te vēsú súcuan te ni quihin de ñn ñn siquī tāca jéē uxí nuū Abraham. Te suni ni jicān tahu de jehē Abraham, vēsú cúu Abraham tēe jeē ni jéjnūhun ya nuū. ⁷ Te jíí vāha yó jéē tēe cújéhnú ga cúu jeē jicān tahu jehē tēe núu ga. ⁸ Te ñayīvī yāha chí tāca sūtū cáquihin de ñn ñn siquī tāca jéē uxí nuū ñayuu, vēsú cácuu te tēe cájihī. Te Melquisedec suni ni quihin de, te máá de chí cáhán tutu iī jeē técu de. ⁹ Te suni cuu cahān yō jeē Leví, tēe jeē ní quihin ñn ñn siquī tāca jéē uxí nuū ñayuu, suni nájñūhun nuū maá de ni quihin Melquisedec ñn ñn siquī tāca jéē uxí. Chí jeē ní jēhe Abraham nuū Melquisedec, suu

cúu nájnūhun jeē suni ni jēhe de jeē siquī Leví jín ndihī ga yucūn de jeē quiji. ¹⁰ Chi yucūn Abraham cúu Leví, te vēsú ná tu cacu de quivī jeē ni jéjnahan Melquisedec Abraham, te nájnūhun jeē ni jēhe máá de cúu jeē ni jēhe Abraham.

¹¹ Te yucūn Leví ni cane sutū Aarón jín táca gá sutū ní quijicoo. Te ni castéén de ley yā nuū ñayuu Israel jenahán. Te núu ní cúu sáha de jeē quendōo ndaā ñayuu jín ley un núú, te tuá cánuú jeē núcuñī inga clase sutū lugar Aarón jín yucūn de. Te inga clase sutū cúu Cristo jeē cúu ya nájnūhun sutū Melquisedec. ¹² Te núu nucuñī inga clase sutū, te suni cánuú sáma ley siquī yucūn de. ¹³ Núu súcuan te ni sáma ley un, chi cáhán tutu ī jeē Jítoho yō Jesús cúu inga clase sutū ún, te ni cacu ya chíji inga yucūn. Te yucūn ní quiji ya ún, tú ni ñn ní cúu sutū. ¹⁴ Chi jíní vāha yó jéé chíji yucūn Judá ni cacu Jítoho yō. Te yucūn ún chi tu ní cáhán cuiti Moisés jeē cánecoo sutū.

¹⁵ Te cájí cúu jeē ní nucuñī Cristo jeē cúu ya inga clase sutū nájnūhun sutū Melquisedec. ¹⁶ Te tu cúu ya sutū jeē ní cacu chíji yucūn Leví nájnūhun cáhán ley jenahán. Chi cúu ya sutū siquī jeē ndíso ya poder cotecu yā ní cáni te ma cúu cuiti yā. ¹⁷ Chi súcuan ni cahán Yaā Dios jnūhun ya: Ní cáni cúu ró sūtū, nájnūhun sutū Melquisedec.

¹⁸ Núu súcuan te jniñu jeē ní ndacu ley jenahán siquī sutū, chi ni naa vijna, chi tu ní níhín jniñu quendōo ní cáni. ¹⁹ Chi ley Moisés tu ní sáha jeē quendōo ndaā ñayuu. Te ni nihín yō ñn jnūhun vāha ga jeē ñūhun ni yō jeē ndáhva Cristo cuēchi yó, te súcuan ni cuyajni yó núu Yaā Dios.

²⁰ Te jíin jéē ni cáhān teyí Yaā Dios te cúu Jesús sutū. ²¹ Chi tāca gá tēe ún, nasūu jíin jnúhun jeē ni cáhān teyí yá ní cúu de sutū. Te Jesús chi ni cahān teyí Yaā Dios jeē cuu ya sutū, chi súcuan cáhān tutu: Ni cahān teyí máá Jítóho yō Yaā Dios, te ma nácani yátá ni yā:

Níí cáni cúu ró sūtū,
nájñūhun sutū Melquisedec.

Achí yá. ²² Núu súcuan te jíin Jesús ni cucutú ñn contrato vāha ga vēsú ley jenahán. ²³ Te tāca gá sutū ún, chi ni iyo cuehē de, chi siquī jeē cájihī de te tu ní cúu cuiñi de níí cáni. ²⁴ Te Jesús chi cúu ya sutū jeē cuiñi níí cáni, chi técu yā níí cáni. ²⁵ Jeē yúcuan ndíso jníñu ya jnama ya ñayuu quíjicoo nuū Yaā Dios, cotecu i níí cáni. Chi níí cáni técu yā te cáhān yā jehē i jíin Yaā Dios.

²⁶ Núu súcuan te vāha ndasí sutū kujéhnú cúu Jesús, jeē nájñūhun jíini ñúhún yó. Chi sutū ñi cúu ya, te tú na cuēchi ya, te íyó ndoo ya, te tu cúu ya jnáhan ñayuu casáha cuēchi, te cújéhnú téyí yá nde nuū sucún gá andiví. ²⁷ Te máá yá tu jíini ñúhún sáha ya nájñūhun ni casáha sutū cácujehnú jenahán, jeē ndiquiví ni casocō de quití siquī cuēchi máá de xīhna gā, te sáá te siquī cuēchi ñayuu. Chi ñn jíinu-ni ni socō yā maá yá jehē yō, te ni cuu-ni. ²⁸ Chi ni jeni ley Moisés tāca sūtū kujéhnú jeē tú na fuerza squícu vāha. Yūcuán na te cuéé gá te ni cahān teyí Yaā Dios. Te jíin jéē ni cáhān teyí yá, te ni jeni ya Sēhe ya jeē cúu ya sutū kujéhnú, te sutū ndaā sutū vāha cúu ya níí cáni.

Jeē ndíso jníñu Cristo siquī ñn contrato jeé

8

¹ Núu súcuan te jñūhun cánuú gá jeē jé ni cahān rī cúu yāhá: Névāha yó ñn sutū kujéhnū nájñūhun ni cahān rī, te ndéé yá lado váha mesa nuū ndácu jñiñū máá Yaā kujéhnū nde andiví. ² Te vijna te cúu ya sutū nde andiví, jeē cúu ndije lugar ñi jeē ni sáha máá Jítóho yō Yaā Dios, nasūu ñáyuu. Chi tu cáa nájñūhun vehe ñi jenahán jeē ní casáha ñayuu. ³ Te tāca sūtū kujéhnū ni jeconaā de jeē socó de ndajñiñū jíin quiñi nuū Yaā Dios. Núu súcuan te Jesucristo suni ni jini ñúhún jeē socó yā jeē cúu ya sutū. ⁴ Te núu ní íyo ga yā ini ñayiví, te ni ma quiñáhan jeē cúu ya sutū jíin táca gá sutū, chi níni cásocō gā de quiñi nájñūhun cáhán ley Moisés. ⁵ Te jñiñū cásáha de, tu quiñáhan jíin jéē iyó andiví. Chi cúu ñn muestra-ni jeē steén siquí andiví. Te cúu nájñūhun jeē ni cáhān Yaā Dios jíin Moisés quiñi ní quejéé de sáha de vehe ñi jenahán: Coto vāha ró jéē sáha ró táca ndajñiñū nájñūhun jító jeē ni steén rī nuū rō nde xinī yúcu, áchí Yaā Dios jíin de. ⁶ Te vijna te sáha Cristo jñiñū jéhnū ndasí gá vésú jeē casáha tāca sūtū ún, chi ndíso jñiñū ya siquí contrato jeé jéē yóhyo vāha ga, chi ndíso jñūhun jéhnū ga jeē ni jéjñūhun Yaā Dios.

⁷ Chi contrato ley xīhna ñúhún, núu jeē ni sáha jeē queé vāha jñiñū núu, te tuá cánuú jéē cóo contrato uū. ⁸ Chi ñayuu jenahán un jéē tu ní cáquendōo ndaā, suhva ni cahān Yaā Dios jíin i, áchí tutu: Quiji quiñi jeē nasáha rī ñn contrato jeé jíin ñáyuu Israel jíin ñáyuu Judá, áchí Jítóho yō Yaā Dios.

⁹ Te ma cóo nájñūhun contrato jeē ni sáha rī jíin jíi i jenahán,

quiv̄i jeē ní jn̄i ri ndaha de jíjnáhan de,
 te ni quenehen ri de ini nación Egipto.
 Chi tu ní cásquícu vāha de jíin contrato ley rī.
 Jeē yúcuan tuá ni táñúhún rí de, áchí Yaā Dios.
¹⁰ Núu súcuan te suhva coo contrato jeē nasáha ri
 jíin ñáyuu Israel,
 nde na quíji quiv̄i yúcuan, áchí Jítóho yō Yaā Dios:
 Sáha ri jeē jécūhun ley rī nuū jeē níjnūnī i,
 te suni ini anuá i tee ri jnūhun ley rī.
 Te cuu ri Yaā Dios maá i,
 te máá i cuu ñayuu maá rí.
¹¹ Te tuá jíni ñúhún stéén i nuū jnáhan i nuū ñáni i,
 návāha cuni i ndese Yaā cúu Jítóho i.
 Chi ndih̄i i cuni ndese Yaā cúu ri,
 nde ñayuu núu ga jíin ndé ñayuu cujéhnu ga.
¹² Chi cone cáhnu ni rī nuū i jeē ní casáha i jniñu
 néé,
 te ni ma núcūhun ga ni rī cuēchi ni casáha i.
 Achí Yaā Dios. ¹³ Te jeē ni cáhān yā jeē cuáha ya
 ñn contrato jeé cúu jeē ní cachi yā jeē tuá cuajníñu
 contrato xīhna ñúhún. Te ñn jeē ní cutúhú jéē tuá
 jejníñu, chi jíni yō jeē je yajni naa.

Vehe iñ ñayiv̄i yáha ní steén ndese cáa andiv̄i

9

¹ Te ndaā chi contrato xīhna ñúhún ní ndacu
 jniñu ndese chiñúhún i ya, jíin ndese coo ñn vehe
 iñ ini ñayiv̄i yáha. ² Te ni cuvāha vehe iñ ún, te ni ñyo
 uū cuarto. Te cuarto xīhna ñúhún jeē naní cuarto
 iñ, ni ñin candelero oro jíin mesa oro jíin pan iñ. ³ Te
 ni ñyo sahma jeē ndíta caa jeē ndihyú ñnga cuarto
 jeē naní cuarto iñ ndasí gá. ⁴ Te ini un ní ñyo ñn
 altar oro nuū cayú sūje cūtú, jíin yéjnū jeē ñúhun

contrato ley, te máni oro cúu ní síquī yejnú. Te ini yejnū un íne ñn tijehēn oro jeē ñúhun maná jeē ní cuun andiví. Te suni íne vara Aarón jeē ní nane numa, jíin tabla yuū jeē yosó jnúhun contrato ley. ⁵ Te síquī yejnú un ní cahīn ndindúú figura ndajéhé querubín jeē steén jeē íne Yaā Dios. Te ni sáha cuandahū síquī tapa yejnū nuū ni cósō yuyú níñī jeē ndáhva cuēchi. Te tu núne yó cáhān gā yō síquī tāca yúcuan vijna.

⁶ Te ná ni jínu tācá un, te núu-ni núu-ni quívicoo sutū ini cuarto xīhna ñúhún jéé casáha de jniñu jeē cúu de sutū. ⁷ Te ini cuarto uū, chi tu cúu quívicoo na-ni sutū jíin inga ñayuu, chi máñúhún-ni sutū kujéhnu ga cúu jeē quíví, te suni ñn-ni vuelta jeē cuiyá. Te suni ma cúu quíví de núu tú níñī quiiti jeē socó de nuū Yaā Dios jeē síquí cuéchi máá de jíin síquī cuéchi ñayuu. ⁸ Te jíin yúcuan stéén Espíritu Santo nuū yō jeē ná ni íyo ga cuarto íi xīhna ñúhún ini ñayíví, te tu ní núne ichi jeē quíví ñayuu ini lugar íi ndasí jeē cúu andiví. ⁹ Chi tāca yúcuan cúu jeē ni stéén ndese cúu tiempo vijna. Chi jeē ní casocō i ndajníñu jíin quiiti nuū Yaā Dios, chi tu ní cúu cuiiti sáha jeē quéndōo ndoo ánuá ñayuu ní casocō ún. ¹⁰ Chi tācá un ní steén máni síquī yíquí cúñu yō, ndese caji yō, ndese coho yó, ndese ndundoo yó. Te ni jejníñu máá-ni nde ni quiiji Cristo jíin ñn modo vāha ga.

¹¹ Chi vijna je ni quiiji Cristo, te cúu ya sutū kujéhnu ga jeē ndíso jníñu ya síquī tāca jéé váha jeē ní quiiji vijna. Te cúu ya sutū ini lugar íi nde andiví jéé kujéhnu ga te vāha ga vēsú cuarto íi jenahán. Te nasūu jéé ní casáha ñayuu cúu, chi nasūu cuenta

ñayiví yáha cúu. ¹² Te jeē ni quíví ya ini lugar iñ ndasí gá nde andiví, te nasūu jíin níñī ndixúhú ni níñī becerro, chi jíin níñī maá yá ni quíví ya, ni socō yā ñn jíinu-ni jeē ní cáni. Te súcuan ni jnama ya yohó jēē cótecu yō ní cáni. ¹³ Chi nde jenahán te níñī síquī jíin níñī ndixúhú jíin yāā becerro jeē ni cáyū nuū altar, ni cacosō yuyú de síquī ñayuu jeē tu íyó ndoo ánuá i, te súcuan ni ndundoo i nuū yā. ¹⁴ Te núu ni nihīn jníñu níñī tācá quití ún, te nagā ni cuu níñī maá Cristo. Chi Yaā ndoo cúu ya, te ni socō yā maá yá nuū Yaā Dios, ni sáha Espíritu jeē iyó ní cáni. Te níñī yā nácate ánuá yō nuū jníñu néé jēē cúu yō sáha. Te súcuan te cuu cuajníñu yó núu Yaā Dios, Yaā técu.

¹⁵ Jeē yúcuan cúu jeē ndíso jníñu ya síquī ñn contrato jeé. Chi ni jihī yā, te súcuan ni quende yā cuēchi ni casáha ñayuu ná ni īyo i chíji contrato xīhna ñúhún. Te ñayuu jeē cána Yaā Dios i quívicoo i ndaha ya, nihīn i tahū i jeē cóo ní cáni, nájnūhun ni jejnūhun ya. ¹⁶ Chi cúu nájnūhun núu sáha ñn tēe acta jeē cahán síquī tahū, te nde na cúu de te níhín jníñu. ¹⁷ Chi núu técu gā tēe ni sáha, te tu níhín jníñu. Te nde núu ni jihī de, te sáa te jéjníñu. ¹⁸ Te suni súcuan contrato xīhna ñúhún, suni ni jini ñúhún cucutú jíin níñī quití ní jíhī. Te contrato jeé chi ni cucutú jíin níñī Cristo jeē ni jíhī yā. ¹⁹ Chi ná ni cuu ni cachi Moisés tācá jniñu ndácu contrato ley un núu ndivii ñayuu, te ni quihin de níñī becerro jíin níñī ndixúhú jíin ndute, te jíin ixi cácuéhé jíin yúcū hisopo ni cosō yuyú de síquī libro ley jíin síquī ndivii ñayuu. ²⁰ Te ni cahán de: Yáha cúu níñī jeē cúcutú contrato ley jeē ní sáha Yaā Dios jíin yó, achí

de. ²¹ Te suni niñī un ní cosō yuyú de nde maá vehe iī jín táca ndajniñu ni cajejniñu de jeē cáchiñúhún de ya. ²² Te je yajni ndihī ndajniñu, chi cáhán ley un jeē jíní ñúhún ndundoo jín níñī. Te núu ma cáti niñī te ma cóne cáhnu ni yā nuū cuéchi núú.

Jeē ni sócō Cristo maá yá jeē quénde yā cuéchi

²³ Núu súcuan te tācá ndajniñu un jéē cácuu muestra tāca jéē iyó andiví, ni jini ñúhún ndundoo jín níñī quití. Te tāca maá jéē iyó andiví, chi ni jini ñúhún ndundoo jín níñī Cristo jeē yóhyo vāha ga. ²⁴ Te Cristo chi tu ní quívī ya ini lugar iī jeē ní casáha ñayuu, chi ñn muestra-ni ni cuu un jéē steén ndese iyó lugar iī ndije nde andiví. Chi maá andiví ní quívī ya, te vijna íne ya nuū Yaā Dios jeē cahán yā jehē yō. ²⁵ Te maá sūtū cujéhnu ga quívī de tāca cuiyā ini cuarto iī gā jeē socó de niñī quití. Te Cristo tu ní sócō yā maá yá cuehē jínu, chi ñn jínu-ni. ²⁶ Chi núu jeē súcuan te cánuú jéē cuehē jínu ndoho ya nde ná ni jecōo ñayiví te nde vijna núú. Te tuú chi sa tiempo cuándihī yāhá ni quenda ndijin yā ñn jínu-ni jeē ní cáni, ni socó yā maá yá jeē ní quénde yā cuéchi. ²⁷ Te nájnūhun ni cundaā jeē cūu tāca ñayuu ñn jínu-ni, yūcuán na te sándaā Yaā Dios jniñu i, ²⁸ suni súcuan Cristo ni jihī yā ñn jínu-ni jeē ní sócō yā maá yá jeē ní quénde yā cuéchi cuehē ñayuu. Yūcuán na te ndiji ya inga jínu, te nasūu jéē socó tucu ya maá yá jeē quénde yā cuéchi, chi sa suhva jeē jnáma ya ñayuu jeē cándetu i jeē ndíji ya.

10

¹ Chi ley Moisés ni cuu ñn muestra-ni tāca jéē váha jeē ní quiji jín Cristo, ñn jeē steén-ni ndese

coo máá jéē váha. Jeē yúcuán tu cúu cuiṭi sáha ley un jéē quéndōo ndaā ñayuu jeē quíjicoo i nuū Yaā Dios jeē cásocō i quiṭi nuū cuiyá nuū cuiyá. ² Chi núu ní cúu sáha ley un jéē quéndōo ndaā i, te jecuiñī jeē cásocō i quiṭi núú. Chi núu ní cúu, te ñn jínu-ni te je ni quendōo ndoo ánuá ñayuu cásocō ún, te ma yūhu gá anuá i jeē ni sáha i cuēchi núú. ³ Te tuú chi jeē cásocō i quiṭi ún táca cuiyá, sa sáha jeē núcūhun ni i cuēchi i. ⁴ Chi ñiñī stíquī jín níñī ndixúhú, ma cúu cuiṭi quende cuēchi.

⁵ Jeē yúcuán ná ni quiṭi Cristo ini ñayīví, te ni cahān yā jín Yaā Dios:

Jeē jéhni i quiṭi jín jéē jéhe i ofrenda nuū ní, chi tu ní nújnahan ni ní.

Te ni sátūhva ní yiqui cúñu maá ná jeē sócō na.

⁶ Te tu ní cúsiñ ni ni jéē jéhmū i quiṭi te sócō i ti jeē ndúndoo cuēchi i núú.

⁷ Yūcuán na te ni cahān ná: Yāha véji ná jéē squícu ná jniñu jeē nújnahan ni ní, Tátā Yaā Dios.

Chi súcuán je yósó jnúhun na núu tútu.

Achí Jesús. ⁸ Xihna gā ni cahān yā jeē tu ní nújnahan ni Yaā Dios te tu ní cúsiñ ni yā jeē jéhni i quiṭi te jéhe i ofrenda, jín jéē jéhmū i ti te sócō i ti jeē ndúndoo cuēchi i núú, nájñūhun ndácu ley jenahán jniñu.

⁹ Te ni cahān gā yā: Yāha véji ná jéē squícu ná jniñu jeē nújnahan ni ní, Tátā Yaā Dios. Te jeē ni cáhān yā súcuán, te ni sáha ya jeē jecuiñī jeē cásocō i quiṭi, chi ni sócō yā maá yá. ¹⁰ Te ni sáha Yaā Dios jeē iyó ndoo íyó lí yō nuū yā siquī jeē ni sáha Jesucristo jeē nújnahan ni Yaā Dios, suu jeē ni sócō yā yiqui cúñu yā ñn jínu-ni jeē ní cáni.

11 Te tāca sūtū ún ndiquiv̄i ni cahīn de ni caje-
jnīñu de nuū yā, te cuehē jínu cájehni de suu quiti
jeē socó socó de. Te tācá un chi ma cúu cuīti quende
cuēchi. 12 Te Cristo chi ĩn jínu-ni jeē ní cáni ni socó
yā maá yá jeē siqūi cuēchi yó. Te sáá te ni cucōo
ya lado váha Yaā Dios nuū cujéhnu ya. 13 Te yūcuan
ndétu ya vijna nde quiji quiv̄i jeē quēnde yā poder
tāca jéē jíto uhū nuū yā. 14 Chi jeē ni sócō yā maá yá
ĩn jínu-ni, te ni sáha ya jeē ní cáni quendōo ndaā
ñayuu ni sándoo ya. 15 Te máá Espíritu Santo suni
cájí cáhán yā siqūi jnúhun yáha, chi xīhna gā cahán
yā:

16 Suhva coo contrato jeē nasáha ri jíin i,
nde na qūiji quiv̄i yūcuan, áchí Jítoho yō Yaā Dios:
Sáha ri jeē jécūhun ley rī ini anuá i,
te suni nuū jeē níjnūnī i tee ri jnúhun ley rī.

17 Yūcuán na te cáhán gā yā:

Ma núcūhun cuīti gā ni rī tāca cuēchi jíin jniñu néé
ní casáha i.

Achí yá. 18 Núu sūcuan te núu je ni ine cáhnu ni yā
nuū cuēchi yó, te tuá cánuú jéē socó gā yō jeē siqūi
cuēchi yó.

Jeē ní nune ichi quiv̄i yó núu Yaā Dios

19 Jeē yūcuan hermano, ma ĩn jeē cáni ni yō, chi
cúu quiv̄i yó lugar ĩ ndasí ndé nuū iyó Yaā Dios,
siqūi jeē ní jeti niñi Jesucristo. 20 Chi ni nune ya ĩn
ichi jéē jéē cótecu yō ní cáni sáha ya. Chi ná ni jihī
yā te ni tahndē sahma ndíta caa jeē ndihyú lugar
ĩ ndasí gá ini vehe ĩ. Te sūcuan ni steén Yaā Dios
jeē núne quiv̄i yó lugar ĩ ndasí gá nuū iyó yá. 21 Te
Jesús cúu sutū cujéhnu ndasí jeē ndító yóhó ñayuu
cácuu sēhe Yaā Dios. 22 Núu sūcuan te na quiv̄i coo

yó núu Yaā Dios, te na cóo ndije ndaā anuá yō, te na cándíje nīhin yó jéē iyó ndāā ndīhi jnūhun ya. Chi jíin níñī Cristo ni ndundoo ánuá yō nuū tāca cuéchi ni casáha yó, nájnūhun ni ndundoo yó núu yā jeē ní jendute yó jíin ndute. ²³ Te na cuñī nīhin yó jíin jnūhun jeē cácahān yō jeē ñūhun ni yō jeē sáha ya jeē váha jíin yó. Te ma cáca yátá yó, chi vāha squícu máa Yaā Dios jeē ni jéjnūhun ya nuū yō. ²⁴ Te na nácani ni yō ndese stīhví jnáhan ni yō jeē cundáhú gá ni yō jnáhan yó, jíin jéē sáha yó jniñu váha. ²⁵ Te níni na ndútútú yó chiñúhún yó yā, te ma cúhuun ni yō nájnūhun casáha sava i, chi sa víhyá gā na stīhví jnáhan ni yō, chi je cájini yō jeē cuácuyajni quivī ndíji ya.

²⁶ Te núu je ni jecūhun ni yō te ni jetáhú yó jnūhun ndaā, te núu máni sáha sáha-ni yó cuéchi, núu súcuan te tuá na inga iyó jéē cúu siquī cuéchi yó. ²⁷ Chi sa quéndōo máni ga jnūhun xeēn siquī yō jeē quiji quivī juicio te quiji yáñuhūn xeēn jeē cayū ñayuu jeē cájito uhū i ya. ²⁸ Ñayuu squéhichī ley Moisés, te núu uū chí únī ñayuu cahán cuéchi siquī i, te cuu nahín i, te tuá na jnūhun cundáhú ni iyó. ²⁹ Te nagā ni cuu jeē ma ndóho xeēn gā ñayuu jeē squéhichī i máa Séhe Yaā Dios, chi nájnūhun jeē jeñú níhnu i siquī yā. Te sáha i jeē tu ndé jéjnīñu níñī yā jeē ní jeti siquī contrato jeē ndúndoo i nuū yā nuú. Te súcuan sáha ndevāha i nuū maá Espíritu Yaā Dios jeē sáha jeē váha yóhó. ³⁰ Chi je jíni yō jeē ni cáhān maá yá: Máa rí sáha jeē ndutahū i siquī cuéchi i, máa rí cuāha castigo i, áchí Jítóho yō. Te suni cáhān: Máa Jítóho yō sándaā yā siquī cuéchi ñayuu yā. ³¹ Núu súcuan te xeēn ndasí cúu jeē quiví

ñayuu ini ndaha Yaā Dios, Yaā técu, jeē ndútahū i siquī cuéchi i.

³² Te na núcūhun ni rō ndese ni cuu ichi yátá, nde náa sá ní quejée ró caca ró jíin luz yā, te ni cajendeyí ni rō ni candoho ró tijni jnūndóho xeēn.

³³ Chi sava ró ní cacahān neé i nuū rō te ni castóho i róhó ní cajito ñayuu. Te sava ga rō ni cajēhe ró jnūhun cuiñi ró jíin ñáyuu ni candoho súcuan.

³⁴ Chi ni cacundáhú ni rō ñayuu ní cahīn vecāa jeē siquí yā, te ni cacusī ni rō vēsú ni caquende ñayuu ndajníñu ró. Chi ni casáha ró cuenta jeē ndé andiví cánevāha ró ĩn tahū jeē váha ndasí gá jeē coo ní cáni.

³⁵ Núu súcuan te ma siaá rō jnūhun jeē ní candíje ndije ró jée váha ni yā, chi cuehē ndasí táhū nihīn rō siquī ún. ³⁶ Chi cánuú jée cuándeyí ni rō návāha sáha ró jée núnjahan ni Yaā Dios, te nihīn rō jeē ni jéjnūhun ya. ³⁷ Chi cáhán tutu iī:

ĩn núnúu-ni te ndee Yaā ndiji, te ma cucuéé yá.

³⁸ Te ñayuu jeē ní ndahva rī cuéchi i, cotecu i jeē candíje i jeē sáha ri jehē i.

Te núu na cáca yátá i, te ma cúsī ni rī jíin i.

Achí Yaā Dios. ³⁹ Te yóhó tu cácuu yó jnáhan ñayuu cájica yátá jeē jnahnú ndetū i. Chi sa cácandíje yó jée nihín tahū yō cotecu anuá yō.

Siquī jnūhun cándíje

11

¹ Te jeē candíje yó, suu cúu jeē cūndaā ndije ni yō jeē nihín yō tāca jée ñúhun ni yō, jíin jée jiní vāha yó jée iyó ndije tāca jée tu cájito yó núu vijna. ² Te ñayuu jenahán chi ni jejnúhún yá i siquī jeē súcuan ni cacandíje nihin i.

³ Siq̄uī jeē candíje yó cúu jeē jécūhun ni yō jeē ni sáha Yaā Dios ñayiví jíin jnúhun ni cahān-ni ya. Te jíin poder Yaā Dios jeē tu jíto yó núū, ni jecōo tāca jéē jíto yó núū.

⁴ Ni candíje Abel jeē sáha ya jehē de, te jeē yúcuan ní socō de jeē váha ga nuū Yaā Dios vēsú Caín. Te jeē yúcuan ní jejnúhún yá jeē iyó ndāā de, chi ni jetáhú yá jeē ní sócō de quití nuū yā. Te vēsú ni jihī de, te cáhán gā ejemplo de jíin yó nde vijna, chi ni candíje ndaā de.

⁵ Ni candíje Enoc jeē sáha ya jehē de, te jeē yúcuan ní naquihin ya de cuahān de andiví, te tu ní jíhí de. Te tu ní cánanihīn ñayuu de, chi ni ndoñúhún-ni de ni sáha ya. Te áchí tutu jeē nde ná tu naquihin ya de te ni cusī ni yā jíin táca jéē ni sáha de. ⁶ Te núu tu cándíje yó jéē sáha ya jehē yō, te tú na modo cusī ni Yaā Dios jíin yó. Chi ñayuu jeē cuní quivicoo ndaha ya, cánuú jéē candíje ndaā i jeē iyó yá jíin jéē cuáha ya tahū nuū ñayuu jeē nducú i candíje i ya.

⁷ Te Noé ni candíje de jeē sáha Yaā Dios jehē de, ná ni castūhun yá nuū de jeē coo jnūndóho jeē ná tu coto de jeē coo. Te jeē yúcuan ní jendetū de ni sáha de barco cáhnu jeē naní arca, návāha cācu de jíin nī vehe de. Te jeē súcuan ni candíje de, te ni cane cuēchi siq̄uī ñayuu jeē tu ní cándíje i ya. Te ni ndahva yā cuēchi de siq̄uī jeē ní candíje de jeē sáha ya jehē de.

⁸ Te Abraham ni candíje de jeē sáha ya jehē de, te jeē yúcuan ní jetáhú de ná ni cahān yā jíin de jeē quihín de ñn lugar nuū cuáha ya cuu tahū de. Te ni quenda de cuahān de, vēsú tu jíin de ndé nuū quihín de. ⁹ Ni candíje de jeē sáha ya jehē de, te jeē

yúcuán ní condee tatú de nuū ñúhun jeē ni jéjnūhun ya jeē cuáha ya nuū de. Te ni condee de vehe ñi, te suni súcuán Isaac jíin Jacob, chi sēhe de ún suni inuú níhīn tahū i jíin de jeē ni jéjnūhun ya. ¹⁰ Chi ni ñuhun ni de condee de máá ñuu andiví jéē iyó cutú cimientó, te máá Yaā Dios ni jequin yā ni sama ya ñuu ún.

¹¹ Te suni ni candíje máá Sara jeē sáha ya jehē ña, te jeē yúcuán ní nihīn ña fuerza jeē ní jecūhun sēhe ña. Chi nde ná ni yāha ndasí cuíyā ña, te ni cacu ñn sēhe yí ña, chi ni candíje ña jeē squícu Yaā Dios jeē ni jéjnūhun ya. ¹² Te súcuán ni cuu jeē ni táhū cuehē ñayuu ni sáha ñn-ni Abraham, vēsú je jéhnū ndasí de. Te yucūn de ni nducuehē ndasí, nájnūhun quīmí andiví, jíin ñíti yumar, jeē ma cúu cuíti cahu yó.

¹³ Te tāca téē candíje un, ní cajihī de. Te vēsú tu ní cájito de jeē ni jéjnūhun ya, te ni cajini vāha de jeē cóo, te ni cacuñi ni de jeē cóto de inga tiempo. Te súcuán ni cacahān de jeē ñáyuu ñuu jicá ñáyuu tatú cácuu de ini ñayiví yáha. ¹⁴ Te tāca téē jeē cahán súcuán, chi stéén cají de jeē nducú de ñn ñuu jeē cúu andiví núu cúu ñuu maá de. ¹⁵ Chi núu jeē cánacani ni de síquī ñúu nuū ní quendacoo de, te íyó modo jeē nándicó cóo de te núu jeē cácuñi de núu. ¹⁶ Te tuú chi ni cacuu ndasí ni de coyūcú de inga ñuu váha ga jeē cúu ñuu andiví. Jeē yúcuán tu cúcanu Yaā Dios jeē naní yá Yaā Dios de jíjnáhan de, chi je ni sátūhva ya ñn ñuu nuū cóyūcú de.

¹⁷ Ni candíje Abraham jeē sáha ya jehē de, te jeē yúcuán ní jehēn de jíin Isaac jeē socó de i, ná ni jito ndee ya de. Te ni ñyo tūhva de jeē socó de sēhe de un jéē mañúhún ni i nuū de, vēsú ni nihīn de jnūhun

jeē ni jéjnūhun ya suhva siquī i: ¹⁸ Isaac cúu tēe jeē squeejéé rí yucūn rō quihīn, achí jnūhun ni jejnūhun ya. ¹⁹ Te ni sáha de cuenta jeē cúu nastécu Yaā Dios i. Te nájnūhun súcuan ni cuu, chí cuu cahān yō jeē nájnūhun ni jihī i te ni natecu i nuū de, chí ni jesi-ni ya jeē ma cáhni de i.

²⁰ Ni candíje Isaac jeē sáha ya jehē de, te jeē yúcuan ní cahān de jeē vāha tahū nihīn sēhe de Jacob jíin Esaú tiempo quiji. ²¹ Te suni súcuan ni candíje Jacob, te jeē yúcuan, náa je yajni cuu de te ni cahān de jeē vāha tahū nihīn ndindúú séhe yíí José. Te yítuu de vara de, ni chiñúhún de Yaā Dios. ²² Te suni súcuan ni candíje José, te jeē yúcuan, náa cuacuyajni cuu de, te ni cahān de jeē tāca yúcūn Israel, ñn quivī quendacoo i nación Egipto. Te ni ndacu de jniñu jeē chindūji i yiqui de ñuu nuū quívicoo i.

²³ Te ná ni cacu Moisés, te tátá i náná i ni ca-candíje de jeē sáha ya jehē de, te jeē yúcuan ní cacondito sáhi de i unī yoō. Chí ni cajito de jeē lúu cáa i, te tu ní cáyūhú de siquī acta jeē ni sáha rey jeē na cúu tāca súchi yíí. ²⁴ Te suni súcuan ni candíje Moisés, te jeē yúcuan ná ni jehnu de te tuá ni jéhe de jnūhun cuu de sēhe ñahan cúu sēhe síhí rey Egipto. ²⁵ Chí sa ni cuu ni de ndoho de jíin táca jnáhan de ñayuu Yaā Dios, nasūu jéé cusíí ní de jecu-ni tiempo jíin cuéchi. ²⁶ Chí ni sáha de cuenta jeē núu cahān neé ñayuu siquī de jeē siquí Cristo, te yúcuan sáha jeē cucá ndasí gá de ndihí jeē ndiso jnūhun Yaā Dios, vésú jeē nihín de ndihí ndajníñu cúca íyó nación Egipto. Chí ni ñuhun ni de jeē cuáha ya tahū de. ²⁷ Te jeē súcuan ni candíje de, jeē yúcuan

ní quenda de nación Egipto cuahān de. Te tu ní yúhú de jeē quití ni rey nuū de. Chi ni īin nīhin de siquī jniñu sáha de, chi ni sáha de cuenta jeē je jito de nuū Yaā jeē tu cúu coto yó núū vijna.

²⁸ Te jeē súcuan ni candíje de, te jeē yúcuan ní cahān de jeē na cáhni ñayuu londe pascua. Te ni ndacu de jniñu jeē na cóso yuyú i niñī tī yehyí i, návāha núu na quíji ndajéhé jeē cáhni yā tāca séhe nuú ñáyuu Egipto, te ma cáhni yā sēhe nuú ñáyuu Israel. ²⁹ Te siquī jeē ní cacandíje ñayuu Israel jeē sáha ya jehē i, te ni cayāha-ni i mēhñu Mar Rojo, chi ni nune ya te ni natūu-ni ñuhun íchi. Te suni súcuan ni cacuni tēe Egipto yāha de núú, te ni nandihyū-ni ndute siquī de ní cajihī de.

³⁰ Ni cacandíje soldado jeē sáha ya jehē de, te jeē yúcuan ní cotúú jeē ní condúū ndihyú ñuu Jericó, ná ni cajicó ndúū de uxā quivī. ³¹ Te Rahab, vésú ñahan tíjni ni ni cuu ña, te ni candíje ña jeē sáha ya jehē ña. Te ni chindéé ñáhán ña tēe Israel jeē ní quijicoo ni condēhé yuhu ndese íyó ñuu ña. Te jeē yúcuan tu ní jíhí ña jíin ñáyuu nīhni ni ñuu ña ún.

³² ¿Te ndé jnúhun ga cahān rī núu súcuan? Chi tuá na tiempo jeē nácani ga rī jnúhun Gedeón jíin Barac jíin Sansón jíin Jefte jíin David jíin Samuel jíin táca tēe ni canacani jnúhun ya nde jenahán.

³³ Ni cacandíje de jeē sáha ya jehē de jíjnáhan de, te jeē yúcuan ní cacundeyí de ni canajñi de tācá ñuu náhnu, te vāha ni candacu de jniñu nuū, te ni chindéé ñáhán yá de nájnūhun ni jejnūhun ya. Te nuū sava de ni jesi Yaā Dios yuhu ndícaha jeē tu ní cáyeji tī de. ³⁴ Te sava de tu ní cáyú de sáha ñuhūn jeē cayú xeēn. Te sava de ni cācu de jeē tu ní jíhí

de jíin espada. Te sava de ni nanihīn ni de náa tuá fuerza de núú, te ndacuī teyí ní ĩyo de nuū guerra, te ni cacundeyí de siquī soldado tācá ñuu jicá jéē jíto uhū ún de. ³⁵ Te sava ñahan ni natecu sēhe ña jeē ni jíhī i.

Te sava ga ñayuu chi sa suhva ni candoho xeēn i nde ni cajihī i. Te tu ní cájēhe i jnūhun jeē siaá i jnūhun ya te cācu i, chi ni catee ni i jeē natecu i coyūcu váha ga i andiví. ³⁶ Te sava ga i ni casácatā ñayuu nuū i, te ni cacani ñayuu i, te nde ni caconuhnī cadena i ni cahīin i vecāa. ³⁷ Te ni cajēhe yuū xinī i, te ni cajehnde i jíin sierra, te ni cajito ndee i jíin jnúndóho, te ni cajehni i jíin espada. Ni cajica cuu i cháha chúcuan, te máá ññi lánchi máá ññi ndíxúhú ní cañuhun i. Ni candoho ndáhú i, ni cajito i jnúndóho, ni castóho ñayuu i. ³⁸ Váha ndasí ñáyuu ni cacuu i jeē tú cuiñi ñayuu ñayīvi súcuan, te vēsú súcuan te ni casáha ñayuu jeē ní cajica cuu i nuū ñūhun téhé jíin chíji yucu, ni cahīin i yaū cava jíin yáū ñuhun. ³⁹ Te tāca ñáyuu yáha, vēsú ni jejnúhún yá i jeē ní cacandíje nīhin i jeē sáha ya jehē i, te tu ní cájito i nuū jeē ni jéjnūhun ya. ⁴⁰ Chi ni sātūhva Yaā Díos ñn jniñu váha ga, te suu cúu jeē sáha Cristo jíin yó, návāha ñn cáhnu-ni nihīn yō tahū yō jíin i, te jeē yúcuan cúu jeē ná tu nihīn i ndihī tahū i.

Jeē na cócunuū yō nuū maá ñn-ni Jesús

12

¹ Te íyó cuéhē ndasí ñáyuu un jéē ní cacandíje nīhin i jeē sáha ya jehē i, te nájnūhun ni jicó ndúū i yóhó, cástéén gā i nuū yō nde vijna jeē suni súcuan na cándíje yó. Núu súcuan te suni máá yó, na téjiyo

yó táca jéē sajnéñu jíin cuéchi jeē ni cáan yó jíin. Te na cuándeyí ni yō cunu yó jíin carrera jeē ni jéhe ya jeē cunu yó. ² Te na cócunuū vāha yó Jesús, Yaā jeē ni scándíje yóhó te sáha ya jeē íje vāha yó jíin jnūhun ya nde jínu ije yó. Chi máá yá ni jendeyí ni yā ni ndoho ya jicā cruz. Te vēsú jnūhun canu cúu jeē súcuan cuu yā, te tu ní sáha ya cuenta. Chi ni ñuhun ni yā jeē sa cusī ndasí ni yā ná ni cuu ni ndoho ya. Yūcuán na te ni cucōo ya lado vāha mesa nuū ndácu Yaā Dios jniñu.

³ Te na nácani ni rō ndese ni jendeyí ni yā ni ndoho ya jeē ni sáha ndevāha ñayuu iyó cuéchi jíin yá. Te súcuan te ma cuíta ró ni ma ndínuu ni rō jíin jnúndóho. ⁴ Chi ni ná tu ndoho ró jéē ndé cuu rō jeē cánducú ndéyí ró snāā rō cuéchi. ⁵ Te sanaa te je ni canaa ni rō jnūhun cáhán tutu ī, jeē stīhví ni Yaā Dios rohó jéē cácuu ró séhe ya:

Séhē, ma quití ni rō jeē snahnú Jitoho yō rohó,
te ni ma ndínuu ni rō núu cáhán yā nuū rō.

⁶ Chi Jitoho yō snahnú yā ñayuu jeē maní yā jíin,
te jéhe ya castigo tāca jéē náquihin ya cuu séhe ya.
Achí tutu. ⁷ Núu súcuan te na cuándeyí ni rō jeē snahnú Yaā Dios rohó, chi sáha ya jíin ró nájñuhun sáha tátá jíin séhe. Chi tú na séhe iyó jéē tu snahnú tátá i. ⁸ Te núu ma snahnú yā rohó, nájñuhun ndóho tāca séhe, núu súcuan te nájñuhun séhe ndáhú cácuu ró, nasūu séhe ndije ya. ⁹ Te tátá yō ñayīvi yáha, suni ni snahnú de yóhó, te ni īyo yíñūhún yó jíin de. Te nagā ni cuu jeē ma cuándetū yō nuū maá Tátá yō andiví jeē snahnú yā yohó, te cotecu yō ní cáni. ¹⁰ Te ndaā chi máá de ni casnahnú de yóhó jecu-ni quiví, ndese ni cuu ni maá de. Te máá yá

chi snáhnú yā yohó ñn modo jeē quéndōo vāha ga yō, návāha coo ndoo yó nájñūhun íyó ndoo máá yá. ¹¹ Te ndaā chi tu cácusī ni yō maá hora jeē ndóho yó castigo, chi sa cúcuíhyá ni yō. Te cúcuéé gá te cuni yō jeē ní quendōo ndaā yō te coo ndeyí sī ni yō jeē ní snáhnú yā yohó.

Siquī ñáyuu jeē casquéhichī i jñūhun cáhán Yaā Dios

¹² Núu súcuan te ma cóo ró nájñūhun tēe ni cuíta íi ndaha te quísi i xinī yití, chi sa ndacuī na sáha ró máá ró nuū jñúndóho. ¹³ Te sáha ró ichi ndóó caca ndaā rō, návāha nduvāha róhó jéē tu fuerza ini, jeē cácuu ró nájñūhun tēe chácuá jeē tu cúu caca vāha.

¹⁴ Te na cóndihvī ni rō jeē condee manī rō jíin táca ñáyuu, jíin jéē cóo ndoo coo íi rō nuū yā. Chi ma cúu coto ni ñn ñáyuu nuū maá Jítóho yō te núu tu íyó ndoo i. ¹⁵ Te coto má cáca yátá ni ñn ró te scuíta ró jñūhun jeē sáha Yaā Dios jeē váha róhó, návāha tú cuu ró nájñūhun ñn yucū uvuá jeē stívī te sáha daño jíin cuéhē ñáyuu. ¹⁶ Te ni ñn ró ma cáca jnéni. Te ni ma cóo jéē ni rō nuū Yaā Dios, nájñūhun ni íyo Esaú. Chi máá ñn cohō ndeyu ni jicān de nuū ñáni de, ni sama de jíin derecho de jeē cúu de sūchi núú, te súcuan ni xícó de derecho de. ¹⁷ Te cájini rō jeē cucuéé gá te ni cuni de jeē na cáhán tatá de jeē váha tahū nihīn de, te tu ní cúu, chi tuá ni táñuhún Yaā Dios de. Chi tu ní nihīn jñíñu jeē ní nacani ni de, vēsú ni nducú ndéyí de te nde ndahyú de.

¹⁸ Te róhó jíináhan ró tu ní quíjicoo ró núu íyo cúu, nájñūhun íyo ni cuu máá yucu nuū ni jéhe ya ley yā nuū ñáyuu Israel. Chi ni cane yáñuhūn yucu Sinaí, te nee lúchi jnúú jító, te quéé tachī xeén. ¹⁹ Te ni

jecu trompeta, te ni cahān Yaā Dios. Te ñayuu jeē ní cajini sōho jeē cahán yā, ni cacahān ndahú i jeē ma cahán gā yā jíin i. ²⁰ Chi tu ní cúndeyí i jíin jnúhun jeē ní ndacu ya jniñu nuū i, chi ni cahān yā: Vēsú ñn quiti-ni núu quivi ti yucu yáha, jíni ñúhún cuu tī jíin yúu chí jíin lanza, achí yá. ²¹ Te siquī jeē íyo ndasí cúu jeē cájito i ún, te ni cahān Moisés: Quisi i ruhū jeē yuhú rí, achí de.

²² Te vijna róhó jéē cá candíje, tu ní quíjicoo ró núu yúcu yúcuan. Chi sa suhva nuū maá yucu Sion jíin núu maá ñuu Yaā Dios, Yaā técu, ni quivicoo ró. Te ñuu un cúu Jerusalén jeē iyó andiví, nuū cáhīyo tútú cuéhē ndasí mil ndajéhé cáchiñúhún Yaā Dios. ²³ Te ni quivicoo ró núu cáyūcu tútú ñayuu cá candíje jeē cácuu sēhe Yaā Dios, jeē iyó lista i andiví. Te ni quivicoo ró núu Yaā Dios, Yaā sándaā jniñu ndíhi ñayuu, jíin núu cáhīyo ánuá ñayuu vāha jeē jé ni squéndōo ndaā yā i. ²⁴ Te suni nuū maá Jesús, Yaā ndíso jniñu siquī contrato jeé ní quivicoo ró. Te yahu ndasí gá jniñu sáha ñiñi yā jeē ni jéti jeē ndáhva cuēchi yó, nasūu níñi Abel jeē ni jíicān cuēchi.

²⁵ Núu súcuan te coto má squéhichī rō jnúhun jeē cahán yā jíin ró jijnáhan ró. Chi ñayuu jeē tu ní cájetáhú ná ni cahān yā jíin i ñayivi yáha, tu ní cácaacu i. Te xeēn gā ndoho yóhó te núu ma cuatáhú yó nuū yā jeē cahán yā nde ichi ándiví núu súcuan. ²⁶ Te nde saá ní quisi i ñayivi jéē ni cáhān yā. Te vijna chí cáhān yā: ñn na jínu quisi ri ñayivi, te nasūu máá-ni ñayivi, chí suni tāca jéē íin andiví, achí yá. ²⁷ Te jnúhun yáha jéē cahán, ñn na jínu, chí cúní cahān jeē téjiyo ya tāca jéē tu íyó cutú, suu jeē ní cuvāha, návāha na quéndōo jeē cóo cutú ní cáni.

28 Núu súcuan te cuāha Yaā Dios ñn ñuu nuū yō jeē cóo cutú nñ cáni. Te jeē yúcuán, na nácuatáhú yó nuū yā, te na chíñúhún yó yā, te na cóo yíñúhún yó, návāha cusñ ni yā jíin yó. 29 Chi Yaā Dios maá yó cóo nájñuhun ñn ñuhūn jeē snāā ndihí jeē neé.

Ndese sáha yó te cusñ ni Yaā Dios

13

1 Ma jécuiñí rō jijnáhan ró jeē cundáhú ni rō hermano rō cácandíje. 2 Conahán ró jeē cánuú cuáha núu ró vehe nuū ñáyuu cájica. Chi íyó jínu jeē súcuan ni cajēhe núu ñayuu vehe, te tu ní cájini i jeē nuū maá ndajéhé andiví ní cajēhe núu i vehe.

3 Te conahán ró chindéé ñáhán ró ñayuu cáhīn vecāa, chi sáha ró cuenta jeē nájñuhun cáhīn cáhnu ró jíin i vecāa. Te suni nacani ni rō jehē jnáhan ró jéé cándoho i sáha ñayuu, chi núu súcuan coo jíin máá ró te suni ndoho ró.

4 Coo yíñúhún ró síquí jnúhun quíjnáhan ñayuu, te ma cosíquí ndéē jnáhan ró. Chi máá Yaā Dios sándaā yā cuēchi ñayuu tijni ni jíin ñáyuu casíquí ndéē jnáhan.

5 Te ma ndíyo ni rō xūhún, chi na cóo sñ ni rō jíin jéé cánevāha ró. Chi máá yá ni cahān: Ma siaá cuiñi rī rohó, ni ma stóo cuiñi rī rohó, áchí yá. 6 Núu súcuan te ma ñn jeē cáni ni yō, chi cuu cahān yō: Máá Jítoho rī chindéé ñáhán yá ruhū, te ma yūhu rí núu na vé cuní ñayuu sáha i jíin rí. Achi yō.

7 Te na núcūhun ni rō tācá pastor rō, jeē ní castéén de jnúhun Yaā Dios nuū rō. Te sáha vāha ro cuenta ndese ni nihīn jníñu jeē ní casáha de, te

na ndácu ró de jeē ní cacandíje de jeē sáha ya jehē de.

⁸ Te Jesucristo chi ñn-ni cáa ya ichi yátá jíin vijna jíin ní cáni. ⁹ Núu súcuan te ma cuáha ró jnúhun candíje ró táca jnúhun jeē sñn cáhán jeē tu quíjnáhan jíin jnúhun máá yá. Chi íyó váha jeē na íje ánuá yō sáha jnúhun jeē váha ni yā jíin yó. Te tu jíini ñúhún yó jnúhun jeē tajnúni síquí jeē yéji yō, chi tu níhín jníñu cuíti jíin ñáyuu cáhín jíin.

¹⁰ Te máá yó chi cánevāha yó ñn jeē ni sócō maá jéhē yō, cúu Cristo. Te tāca sūtū jeē cásocō gā de modo jeē cahán ley jenahán, tú na vé nihín de nuū yā jeē ni sócō yā maá yá. ¹¹ Te sutū cujéhnu ga, ná ni socō de niñī tācá quíti ini cuarto íi gā jeē síquí cuéchi, te yíquí cúñu tí ni cajehmu de ichi yátá ñuu. ¹² Te suni súcuan ni ndoho máá Jesús ichi yátá ñuu, návāha jíin níñī maá yá te sándoo ya ñayuu. ¹³ Núu súcuan te ma cóo inuú gá ni yō jíin ñáyuu tu cácandíje, chi nájnūhun quihín yō jíin yá ichi yátá ñuu, te na ndóho yó jíin yá jeē sácatā i. ¹⁴ Chi ñayívi yáha tu íyó ñuu nuū coo yó ní cáni, chi sa cánducú yó máá ñuu nuū cóyūcu yó quívi quíji. ¹⁵ Núu súcuan te jeē jíin Jesucristo te níni na cáhán yō jeē yóhyo cújéhnu Yaā Dios, chi suu cúu nájnūhun ñn jeē socó yō nuū yā, suu jeē nácuatáhú yó nuū yā. ¹⁶ Te ma náā ni rō sáha vāha ró núū jnáhan ró, te cuāha ró jéé cúmaní nuū i. Chi nájnūhun ñn jeē cásocō rō nuū Yaā Dios cúu tāca jéé yáha, te cúsiñ ni yā jíin.

¹⁷ Te cuandije ró núū tēe cácuu pastor rō, te cuandētū rō nuū de. Chi cándito de róhó jéé quéndōo vāha ánuá rō, chi cájini de jeē cánuú nacuāha de cuenta nuū yā. Te condíhvī ni rō sáha vāha ró,

návāha cusī ni de siquī rō te ma cucuíhyá ni de siquī rō. Chi núu tu súcuan te ma cóo jeē váha jíin ró.

¹⁸ Te cacān tahú rō jehē rī jijnáhan ri. Chi vāha íyó ni anuá rī jeē tú na cuēchi rī. Chi cáconi rī caca yíñúhún rí jíin táca jniñu. ¹⁹ Te suni cáhán ndahú rí jíin ró jeē cacán tahū ndasí ró jehē maá rí, návāha cuāha ya jnūhun jeē yachī gā cuajeē tucu ri nuū rō.

Bendición jíin saludo jeē sándhí

²⁰ Te máá Yaā jeē jéhe jnūhun ndeyí sī ni nuū yō, ni nastécu yā Jitoho yō Jesucristo mēhñu ndíyi. Te Jesús cúu pastor kujéhu jeē ndíto ñayuu cácuu nájñūhun lanchi ya. Chi jíin níñī yā ni sácutú yá contrato jeé yá jeē coo ní cáni. ²¹ Te ñūhun ni rī jeē Yaā Dios na sáha ya jeē ije ni rō jijnáhan ró, návāha cuu sáha ró táca jniñu váha ndese nújnahan ni yā. Te ñūhun ni rī jeē jíin fuerza Jesucristo jeē ndeé yá ini yō, na sáha Yaā Dios jeē cuu yó ñayuu cúsi ni yā jíin. Te na cáhán yō jeē yóhyo luu cújéhu ya ní cáni. Amén.

²² Hermano jijnáhan ró, cáhán ndahú rí jíin ró jeē cone cáhnu ni rō jeē stihví ni rī rohó jíin jecu-ni jnūhun ni tee ri nuū carta yáha. ²³ Te cástūhun rí jeē hermano yō Timoteo, je ni quenda de vecāa. Te núu yachī quiji de yāhá, te cuajecoo ndíndúú rí nuū rō coto jnáhan yó.

²⁴ Te cahān rō jíin táca tée cácuu pastor rō jíin táca hermano cácandíje jeē sándeýí ni de, áchí rí. Te ñayuu Italia suni cácahān i jeē sándeýí ni rō.

²⁵ Te ñūhun ni rī jeē na sáha ga Yaā Dios jeē váha rōhó jíijnáhan ró. Súcuan na cóo. Amén.

Nuevo Testamento en mixteco
New Testament in Mixtec, Atatláhuca (MX:mib:Mixtec,
Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9665e546-39d0-5bd5-8b10-38916a94951f